

Lein seregurdar dil defunct

GR 8.4.86

## Tumaisch Schmid, Sedrun



(G.F.) Ils 10 da schaner 1986 ha il zenn da s. Vigeli annunziau la mort da nies bien convischin Tumaisch Schmid-Berther. Tenor giudicar human eis el morts memia baul.

Il defunct ei naschius ils 3 da settember 1921 ord la secunda lètg da Placi Sigisbert ed Onna Maria Schmid, nata Deragisch (dalla emprema lètg ei sortius il zun enconuschent a. mistral Teofil Schmid). Tumaisch ei staus in dils treis schumellins. In dad els ei bingleiti turnaus enta parvis. Tumaisch ei restaus anavos cul frar Giuseppe che viva aunc. La famiglia era gronda cun 8 buobs e 4 buobas. Il trappassau ha passentau ina biala affonza ensemens cun ses fargliuns e geniturs. Il bab ha stuiu murir bia memia baul. Suenter ver fatg la scola da recrut ha ei tuccau a Tumaisch Schmid da far survetsch als cunfins. Ei fuva il temps

dall'uiara. Entuorn dus onns eis el staus a Biel en ina fabrica dad uras. Ei veva num: fadigar e segidar culs da casa. Ei deva lu buca quellas bunas caschuns da far in emprendissadi sco ozildi. El scheva encrescher per la val Tujetsch. Quei ha buca schau ruaus ad el entochen ch'el ei turnaus a casa.

Igl onn 1958 daventa Maria Berther da Camischolas sia consorta. Lur lètg vegn benedida cun duas stupentas buobas ch'ein stadas la legria ed il plascher dils cars geniturs. Cun ferma cardientscha e fidonza el Segner mava quei stupent. Il preziau defunct ei staus cau-menaschi, sustenius da sia dunna, ella cascharia a Sedrun. Biars onns eis el era staus in fidau signun ad alp. Era egl uaul ha el luvrau tier la vischnaunca. Buca meins che 13 onns eis el staus engaschaus tier ils runals en Tujetsch ed ils davos onns tier la nova firma «Smart» che veva gest aviert sias portas. Leu ha el luvrau entochen ch'ina malsogna maligna ha sfurzau el da remetter la lavur avon il temps d'ir en pensiun. In nausch astma ha mudergiau fetg quei um.

Denton il Tumaisch ha priu quei ord ils mauns da Diu ed ei seremess. El ha encurriu levgiament tier ils specialists. Mo ei fuva destinau auter. Da notg, tut surura, han ei stuiu transportar el el spital a Glion. Leu eis el aunc vivius zacons dis. – Ils 13 da schaner ha in grond pievel accumpaignau el alla fossa. A sia consorta ed allas feglas – sco era a tut las famiglias en malencurada – seigi admess nossa condolientscha sincera. Il Segner detti ad el il riuau perpeten.